

四庫全書

集部

欽定四庫全書

石倉歷代詩選卷三百六十三

明 曹學佺 編

明詩初集八十三

蘇平

字秉衡海昌人舉賢良方正不就  
有雪溪漁唱

箕山操

箕之山可以樵箕之水可以漱爰洗我耳爰棄我瓢  
四無人聲弗喧弗囂我友于巢弗臣于堯清風穆穆聊傲

世以逍遙

陋巷操

巍巍尼父兮吾得師之悠悠大道兮吾得窺之簞有食  
兮適充吾飢瓢有飲兮聊解渴為人不可堪兮吾樂孔  
宜

精衛操

精衛禽怨長在西山有石東有海銜石填之良有待海  
若塞乾恨迺釋口血離離羽毛濕

別鵲操

彼黃者鵲雌雄其侶既宛其頸復戢其羽汝不畜離義  
當去汝雌飛動哀鳴雄感別離苦不願鳥生八九子但  
願同巢共生死

艾而張

艾草莽張虞羅雀高飛離蓬窩入網少出網多野田啾  
啾啄枯木雀兮雀兮奈爾何

將進酒

金  
君不見劉伯倫一飲一石陶天真又不見阮步兵沈酣  
累月不整醒百年三萬六千日世上幾人能滿百昨日  
對明鏡髣髴已白安得魯陽戈為我回羲和來日已  
少去日多坐令豪傑成蹉跎我欲服食金光草神仙有  
無何足道我欲挾策朝帝關九重崔嵬不可攀不如築  
糟為臺玉為斗與君共樂無何有萬古虛傳身後名一  
尊共盡生前酒

紫凰曲

銀蟾貼天流素光玉峰仙人吹紫凰紫凰離羣發清嘯  
思入寒雲悲怨長餘音嘶風山石裂梅花飛春墮香雪  
馮夷宮中龍夜愁鮫人學語聲幽修江波淡淡寒不流  
七十二峯凝暮秋急管繁絃不須數轉羽移商調尤古  
空山野人踏哮虎隔竹湘妃泣秋雨有時無聲似有聲  
欲與彩鳳相和鳴秦皇女兒去不返碧海三山夢魂斷

五言雜咏

彼美南國姝婉孌貞且良青霞以為珮明月以為璫白

玉蓄光彩幽蘭含馨香日東流黃機五彩成文章見者  
為歎息不殊古姬姜世無蹇修氏玉帛不時將脉脉處  
重閨何曾下中堂容顏豈不好覽鏡徒自傷但恐芙蓉  
花搖落隨衆芳

寄金粟公子

中夜百憂集攬衣起徬徨明月揚素輝列宿互低昂耿  
耿河漢流肅肅鴻雁翔念我同心人邈焉越一方昔為  
雙游魚今為孤飛凰援琴不成寐展轉幽思長豈無蔥

蘭花為君掇其芳道遠莫致之撫懷徒自傷

寄逯頤正主事

猗猗蕙蘭花宛在水中央朝露沐華澤春陽汎宗光煜煜  
合素姿盈盈婉清揚恥為桃李顏混彼蕭艾行川澤寂  
無人脩然藹餘芳采之欲誰遺同心恨河梁引領空跼  
蹐日暮幽思長

親蘭

盈盈九畹姿托根在沅湘朱華吐幽艷煜煜含朝陽湛



露濯其英光風揚芬芳蕭艾非所伍猶管詎為行媛嬈  
不自媚無迺國之香泠泠尼父琴操之為悲傷德馨固  
所重采以紉荷裳允哉親蘭心佩之期無忘願言慎初  
服令聞日以彰

讀螺城集

末俗薄風雅幽懷鬱難任黃鐘久弗奏下里徒注淫不  
見涓與褱疇能宣我心誰知百世下始聞南風琴一彈  
再三唱太古有遺音調遠意自適山高水瀰深孤鴻唳

遠漢翔鸞鳴高林  
聆罷復嘆息涼飈濯余襟

劉生

結客皆豪毅英風聞四方  
錦衣蒼玉珮白馬紫絲韁  
排難死知己橫行出邊疆  
君恩殊未報龍劍夜生光

銅雀妓

銅雀荒秋草羅衣不再薰  
淚流漳水恨雨散楚臺雲  
夜月停歌扇春風罷舞裙  
西陵遙在眼脉脉倚斜曛

關山月

萬里看圓缺中天一氣浮光搖紗障夕影落玉闌秋少  
婦閨中見征人笛裏愁嫦娥知別苦偏照海西頭

王昭君

柔遠藉蛾眉承宣出禁闈玉顏輕畫史珠淚濕羅衣  
主心徒在和親事已非相隨惟漢月萬里到金微

擬宋之問應梁王教宴龍泓

臺榭俯靈源風光似禁垣吹笙下緱嶺飛蓋入西園  
鳥逐歌聲斷花隨舞袖翻慚非枚乘匹環珮侍金門

塞上曲

戰馬聞笳鼓橫行出塞門  
陣雲凝隴黑殺氣入邊昏  
決策平沙漠捐生報國恩  
猶慚漢公主萬里嫁烏孫

擬杜甫春夜宿左省

掖垣分夜直何必羨瀛洲  
象緯低龍闕河山繞鳳樓  
禁鐘隨漏盡宮月向人流  
獻納明光裏能忘賈誼憂

長門怨

君恩殊未盡新寵一何深  
寶鏡留塵影瑤階斷履音  
病

容消白玉秋賦費黃金千古長門月那能照妾心

擬和太常韋主簿五郎寓目

謾說秦關百二重夕陽回首露臺空參差碧樹迷行殿  
重疊青山繞故宮小苑啼鶯留醉客邊城遊騎獵元戎  
當時獻納甘泉裏更有何人賦最工

擬積雨輞川庄

經旬煙雨暗東菑荷蓀空林路欲迷田畯秉耒春催布穀  
山妻當午餉蒸梨桃花水滿鷓鴣下桑柘陰深戴勝啼

習靜山人跡少門前芳草綠應齊

擬過賈誼宅

楚鄉卑濕嘆殊方賦鵬人非宅已荒謾有長書憂漢室  
空將哀些弔沅湘雨餘古井生秋草葉盡疎林見夕陽  
過客不須頻太息咸陽宮殿亦淒涼

擬登余干城

楚鄉南上獨盤桓風景蕭蕭落葉乾百戰山河空寂寞  
幾家耆舊半凋殘背人孤鳥蒼煙暝臨水荒城白日寒

回首弋陽溪畔路令人懷古思漫漫

擬宿淮浦寄司空曙

偶來淮海寄行蹤況復懷人嘆轉蓬  
千里雲山長在別十年書劍不相逢  
孤舟涼雨隨風入極浦寒潮向夕通  
惆悵楚天清夜月不知尊酒幾時同

擬蘇臺至望亭驛人家盡空悵然有作寄從弟  
亂離征騎獨南還零落羈魂益慘然  
草色漸看侵驛路客愁無復見人煙  
江村古木迷蒼靄野水平蕪際碧天

咫尺故園歸未得  
鼓鼙聲裏度新年

擬湘南懷古

江山搖落獨登臨  
草色湖南入望深  
萬古空留湘女恨  
九歌誰識屈原心  
霜清楚畹蘭香歇  
雲暗已陵雁影沈  
正是客懷消不得  
竹枝聲裏斷猿吟

奉寄黃少保宗豫

不學留侯慕赤松  
急流能退幾人同  
四朝輔弼推元老  
一代勲名列上公  
綠野放歌明月裏  
青山高卧白雲中



心懸北斗遙瞻仰誰似文章繼國風

奉寄金粟公子

回首雲霄憶舊遊  
鳳凰臺畔楚江頭  
西園久負花時席  
東郭虛勞雪夜舟  
夢裏青山人更遠  
鏡中華髮歲空流  
秋風不見南來雁  
煙樹蒼茫動別愁

贈孫大叅子良

曾侍先皇沐寵輝  
白頭報國似君稀  
故山夜雨存黃菊  
華省春風對紫薇  
方岳久霑申伯化  
鄉人爭待潞公歸

青雲先達知多少獨向天涯問布衣

寄劉源博蔣主忠金公瓚并懷玉山知己

門徑無塵客到稀白雲流水淡忘機  
地經積雨殘花盡鳥度空山夕照微  
賈誼有才猶未達馬卿多病獨思歸  
玉峰知己分攜久誰共林泉賦采薇

寄沈倅侗

林泉詩酒共忘機此別翻憐會面稀  
明月海天將夢遠青雲軒冕與心違  
江城暮雨砧聲斷澤國秋風雁影微

金史卷之三  
卷三百六十三  
獨立滄洲誰是伴白鷗煙水思依依

寄故園諸弟

京國從親歲月深遙憐諸弟隔家林  
思尊父負秋風興  
夢草空驚夜雨心鄉信楚江逢斷雁  
客愁梁苑度踈砧  
何應得似彭城會尊酒相看共醉吟

寄金粟公子

逍遙林下淡忘機芳草寒塘獨掩扉  
明月心期天外迥  
流年華髮鏡中稀白鷗滄海閒情遠  
黃葉青山舊業微

回首習家池上路重來清興未應違

酬弟秉中見寄

茆屋蕭蕭野水濱惟應魚鳥日相親  
閒庭暮雨驚黃葉短棹西風釣白蘋  
曼倩飢來還自笑陶潛醉裏竟忘貧  
惠連羣從詩偏好幾度西堂入夢頻

秋日書懷

十年京國敝貂裘百事無成已倦遊  
客裏青衫司馬淚天涯明月杜陵愁  
秦淮煙暝砧聲夕楚澤雲深雁影秋

南望故園歸未得懶將詞賦獨登樓

寄錢允言

扁舟憶昔過吳門最喜君家古道存  
夜月獨懸徐孺榻春風曾造辟疆園  
竹深啼鳥驚詩夢石上寒流醒醉魂  
回首海山雲樹遠百年心事共誰論

酬醉雪松泉

一別青山會面稀望中煙樹轉依依  
閒庭暮雨林花落老圃春香藥草肥  
鷗鳥忽隨流水去鸛羣長伴白雲飛

鼎湖久負蘭舟約幾度聞吟對夕暉

酬醉雪見訪

郭溪流水勝山陰獨棹扁舟物外尋孤館共聽今夜雨  
青燈相對十年心雲迷雁影驚秋色露冷蛩聲助客吟  
一曲瑤琴思無限幾人湖海是知音

送沈愚歸玉峰

皇州鶯囀柳條新客裏那堪此送君歸夢不離吳苑月  
還家高卧玉峰雲江村貰酒逢寒食驛路看山對夕曛

金匱要略卷之四  
最是臨歧分手處落花離思共紛紛

送駱泰入蜀省兄

回首鵲原感別離片帆遙度夜郎西雲深蜀魄呼名語  
月冷巴猿向客啼諸葛祠堂春草沒杜陵茆屋夕陽低  
相思亦有南來雁莫道音書醉懶題

送劉叅政叅謀宣府

紫塞迢遙舊路微西風駟馬去駢駢山連剌勒沙場遠  
草盡烏孫部落稀入幕陳琳能草檄防邊李牧解乘機

平生報國存孤劍不斬樓蘭竟不歸

送人歸豫章

旅館思親動別愁鄉園回首是南州雲山向晚千峰出  
汀樹經霜亂葉流斗酒高吟彭蠡月片帆遙度楚江秋  
懸知獨坐蓬窓雨夜思千重戀舊遊

送張宗顯

西湖風景舊繁華家在青山去路賒萬里斷蓬驚客鬢  
亂峰殘雪夢梅花帆投極浦寒煙積門掩孤城落日斜



惟有別離情不斷遠隨流水到天涯

送張景歸四明

萍水相逢此識君天涯蹤跡又離羣  
夢隨海月鄉心遠愁逐江流客路分  
極浦斷鴻驚暮雨亂山孤騎入寒雲  
空齋別後門還掩詩酒何人話夕曛

送呂元素

采服寧親賦獨歸白雲何處是庭闈  
越南故國青山遠江上寒潮舊路微  
千里共看明月在一尊終念故人違

洛陽年少才偏富，霄漢誰當薦布衣。

送葉景齡北上

共羨觀光上紫宸，幾多冠蓋望行塵。  
孤舟流水離情遠，小店飛花送酒頻。  
千里雲山淮甸夕，萬家煙樹帝城春。  
承恩有待南歸日，重向高堂戲綵新。

和金粟公子韻

迢迢香徑入中林，曾記春風此盍簪。  
絕壑踈松雲度影，小山叢桂月生陰。  
花邊啼鳥驚詩夢，石上寒泉淨客心。

別後定知塵事少只應猿鶴伴鳴琴

和總戎尚志陳公韻

將軍韜略擅才雄赫赫聲名振海東沙浦晴煙秋滅竈  
天山明月夜張弓星搖佩劍龍光冷日射征袍獸錦紅  
令肅轅門邊警息幾回談笑坐春風

劉阮入天台遇仙子

洞門煙景曉蒼蒼誰道神仙是渺茫銀甕流霞頻醉客  
玉笙吹月慢調簧仙遊玄圃春偏好身入壺天日正長

只恐塵凡勞夢想此中無計更留郎

仙子送劉阮出天台

迢迢煙景接三台此別劉郎更不來  
夜色獨憐明月在春風惟見碧桃開  
山中流水隨人去洞口閒雲伴鶴回  
仙境塵寰元自隔空留遺跡印青苔

劉阮重到天台不復見諸仙

天台何處覓玄真今日重來迹已塵  
絕壑寒林惟有月空山流水四無鄰  
不逢仙犬雲間宅謾說桃花洞裏春

惆悵此生那復見煙霞回首更愁人

遊鐵柱觀

高明宮殿鎖煙霞世隔仙凡一徑斜石甃有靈遺鐵柱  
瑤臺無路問丹砂黃猿夜嘯孤峰月白鹿春眠一洞花  
松下道人能愛客幾回留我飯胡麻

晚出南浦

獨倚蓬牕望轉迷故園遙隔楚天西漁村寂寂孤煙遠  
海嶼亭亭落日低歸路不堪春草綠思家況值暮猿啼

只應懷古無窮意幾處江山入品題

彭蠡舟中

江上西風逐去航  
驛程南下水茫茫  
思親客路看雲影  
別弟天涯見雁行  
樹帶斷煙迷楚澤  
潮隨明月到潯陽  
誰知萬里孤吟客  
獨對青燈憶故鄉

泊東湖

往來江漢久淹留  
蹤跡還同馬少游  
鄉思不堪逢斷雁  
閒身那得似浮鷗  
疎燈映竹人家暝  
亂葦驚風野渚秋

今夜扁舟何處泊  
岼傍沽酒一消愁

長橋夜泊

曦棹垂虹近驛樓  
水晶宮裏夜深遊  
腥風隔浦吹漁網  
遠火臨江映客舟  
萬頃煙波寒浸月  
一天星斗倒涵秋  
酒醒共向蓬牕坐  
歌罷滄浪起白鷗

李二尹敏陪遊惠山寺

花縣鳴琴訟簡時  
春風聯騎赴幽期  
雲浮曙色迷青嶂  
雨過寒聲瀉碧池  
竹裏開軒僧供茗  
松間掃石客題詩

明朝依舊紅塵隔回首煙蘿入夢思

中秋宴城南俞氏館賞月

玉宇澄鮮一鏡流此身何必廣寒遊  
光搖河漢中天夜影落關山萬里秋  
人醉霓裳雲外曲杯傳金谷海邊樓  
詩成高卧吟壇上不覺涼生白苧裘

四皓圍棋圖

共將聲迹遁巖阿靜裏看棋趣自多  
幾着消磨秦日月一枰匡復漢山河  
溪邊夜雨生芳草谷口春風裊薜蘿



憶自寓形已橘裏商於誰和采芝歌

蔡琰歸漢圖

中郎有女貌如花  
流落單于歲月賒  
北去千金勞漢使  
南來萬里度龍沙  
哀吟調入邊笳  
慘歸路愁看塞雁斜  
腸斷殊方分手處  
黃雲衰草隔天涯

江村秋暮圖

江鄉風物遠依微  
雲樹離離帶夕暉  
黃葉亂隨流水去  
青山遙映白鷗飛  
一聲牧笛和煙暝  
幾處漁舟載月歸

有客年來簪組繫謾來清夢想柴扉

秋景圖

雙溪雨過夕流清萬頃煙波入望平  
兩岼碧峰凝暮色一庭黃葉墮秋聲  
西風遠浦征帆小落日青山去鳥明  
寄語讀書林下客莫因高卧謝時名

紫微山

紫微山色倚空青天外參差列畫屏  
佛國樓臺青嶂合仙家洞府白雲扃  
松花雨過通泉脉芝草香生識地靈

日暮倚闌清興遠樵歌多在醉中聽

白鷺春波

鷺洲煙水渺無涯勢接龍江繞帝家風度暗香知杜若  
浪浮春色見桃花雁迷涼雨連芳渚鷗帶寒潮浴淺沙  
回首蓬萊天咫尺仙遊且擬沂靈槎

鼎湖夜月

湖心有褚无  
量讀書堆

湖上娟娟月色浮無窮清景滿滄洲光搖波浪孤輪夜  
影落山河一鏡秋寄跡書堆人已去東槎銀漢客同遊

姮娥自是多情物時遣餘輝照綵舟

遊會稽

雞黍論心願不違孤舟南下思依依天連禹穴蠻雲遠  
水滿耶溪越鳥飛風月多情詞客在江山有待故人稀  
登臨慢憶蘭亭會衰草斜陽迹已非

石倉歷代詩選卷三百六十三

欽定四庫全書

石倉歷代詩選卷三百六十四

明 曹學佺 編

明詩初集八十四

沈瓊蓮

字瑩中烏程人弘治初  
選入掖庭官為學士

送弟就試春官

自少離家侍禁闈  
人間天上路依稀  
朝迎鳳輦趨青瑣  
夕捧鸞書入紫微  
銀燭燒殘空有淚  
玉釵敲斷竟無歸

年來望爾登金籍同補華蟲上衮衣

閬州婦

宋氏金華人閬州太守妻洪武初編戌金齒

題郵亭壁歌

郵亭咫尺堪投宿手握親姑憇茅屋抱薪就地旋  
鋪攤支頤相向吞聲哭旁人問我是何方俛首哀  
哀訴衷曲妾家祖居金華府海道曾為正千戶連  
艘運粟大都回金牌勅賜雙飛虎兄弟晦跡隱山  
林甘學崇文不崇武今朝玉堂宋學士亦與妾家

同一譜笄年嫁向衢州城夫婿好學明詩經離騷子  
史徧搜覽志欲出仕魁蒼生前春郡邑忽交辟辭  
親千里趨神京丹墀對策中殿舉馳書歸報泥金  
名承恩拜除閬州守飄然畫舫西南行到官未幾  
訪遺老要把奸頑盡除掃日則升堂治公務夜則  
挑燈理文藁守廉不使纖塵污執法致遭僚佐怒  
府推獲罪苦相攀察院來提有誰訴臨行囊橐無錙銖  
惟有舊日將去書城中父老泣相送道傍過者咸嗟吁



一時徵賦動盈萬妾夫自料無從辦經旬苦打不成招  
暗囑家人莫送飯嗟乎餓死囹圄中旗軍原籍來抄封  
當時指望耀門戶豈期一旦番成空親鄰憐妾貧如洗  
歛鈔慙慙饋行李伶仃三口到京師奉旨編軍戌金齒  
阿弟遠送龍江邊臨歧抱頭哭向天姊南弟北兩相痛  
別後再會知何年開船未遠子病倒求醫問卜皆難保  
武昌城外野坡前白骨誰憐葬青草初然有子相依傍  
身安且不憂家蕩如今子死姑年高縱到雲南復誰望

八月官船渡常德促裝登途整行色空林日暮鷓鴣啼  
聲聲叫道行不得上山險如登天梯百戶發放來取齊  
雨暗泥滑把姑手一步一仆身沾泥晚來走向營中宿  
神思昏昏倦無力五更睡重起身遲飯鍋未熟旗頭逼  
翻思昔日深閨內遠行不出中門外融融日向上欄杆  
花落庭前鳥聲碎寶髻斜簪金鳳翹翠雲蟬鬢蛾眉嬌  
繡牀新刺雙蝴蝶坐久尚怯春風饒豈知一旦夫亡後  
萬里遐荒要親走半途日暮姑云飢欲丐奉姑羞舉口

同來一婦天台人情懷薄似秋空雲喪夫未經二十日  
畫眉重嫁鹽商君血色紅裙繡羅襖終日騎驢涉長道  
穩坐不知行路難揚鞭笑指青山小取歡但感新人心  
那憶舊夫恩愛深吁嗟風俗日頹敗廢却大義貪黃金  
妾心汪汪澹如水寧受飢寒不受恥幾回欲葬江魚腹  
姑存未敢先求死前途姑身少康健辛苦奉姑終不怨  
姑亡妾亦隨姑亡地下何慚見夫面說罷傷心淚如雨  
嗚咽垂頭不成語路傍過者為酸心隔嶺孤猿叫何許

方氏

雜詩

營巢燕雙雙飛天設雌雄事久期雌兮得雄願已足雄  
兮將雌胡不知

其二

營巢燕聲呶呶莫使青年空歲月可憐和氏忠且純何  
事楚君終不納

兩女郎鐵氏

侍郎鉉之女也靖  
難時配入教坊

教坊獻詩

長女作

教坊脂粉洗鉛華一片閒心對落花舊曲聽來猶有恨  
故園歸去已無家雲鬟半挽臨粧鏡雨淚空流濕絳紗  
今日相逢白司馬尊前重與訴琵琶

教坊中呈原問官

次女作

骨肉相離舊業荒一心何忍去歸娼淚垂玉筋辭官舍  
步歛金蓮入教坊覽鏡幸無傾國色向人休學倚門粧  
春來雨露寬如海嫁得劉郎勝阮郎

孟居士

悼亡

斑斑羅袖濕啼痕  
深恨無香使返魂  
豈蕊花存人不見  
一簾明月伴黃昏

長信宮

滿階紅葉雁聲頻  
永巷秋深最愴神  
君意一如秋節序  
不教芳草得長春

香奩冬詞

默坐深閨思有餘，霜威漸覺襲衣裾。  
青綾被冷無鴛夢，紫塞天寒斷鴈書。  
竹葉舞風侵戶響，梅花和月上牕虛。  
雙蛾爭似庭前柳，臘盡春來忽又舒。

題畫

巖樹盤雲轉溪紆，路亦斜晚來煙靄合。  
無處認山家。

春歸

落盡海棠水拍堤，萋萋芳草望中迷。  
無情最是枝頭鳥，不管人愁只管啼。

席上贈妓

石榴裙子稱纖腰  
唱歌新聲換玉簫  
背立東風偷拭淚  
為誰腸斷為誰嬌

登樓

為憐春去不登樓  
繞上南樓動遠愁  
滿地落花紅雨亂  
接天芳草綠雲稠

秋日書懷

蟬咽庭槐泣素秋  
幾行新鴈度南樓  
天邊莫看如鉤月



釣起新愁與舊愁

陸寡婦

賣廢宅

壁有蒼苔甌有塵  
家園一旦屬西鄰  
傷心怕見門前柳  
明日猶如陌路人

冠子

汝年三歲父亡身  
汝父先亡母苦辛  
難得光陰到今日  
加冠見汝又成人

錢氏女

述懷

靜守深閨歲屢遷  
蕙心蘭質自娟娟  
援琴不奏桑間曲  
揮翰寧題葉上聯  
龜灼已知無吉兆  
鵲橋那得有良緣  
芙蓉只合含霜死  
肯向西風怨暮年

石倉歷代詩選卷三百六十四

欽定四庫全書

石倉歷代詩選卷三百六十五

明 曹學佺 編

明詩初集八十五

張無為

龍虎山人天師  
四十三代孫

次韻蘇素菴先生雜詩

微月生東海  
明河澹疎星  
露華集灌木  
衰草陰蛩鳴  
虛襟坐長夜  
撫摠餘情萬  
有等埃腐云  
胡勞死生悲  
懽懽

偶大夢歲月徒斯征感此奚足歎百年同醉醒

次韻蘇素菴先生詠古

先主志復漢屈身知下士卓哉卧龍君功烈昭文史圖  
略過孫曹桑田足資已凜凜出師言忠貞見生死

過錢塘

越上曾遊地年深感寂寥山光隨浦盡海色共天遙古  
刹藏秋樹寒江送暮潮故人渾不見愁緒酒難消

山莊留別滕用衡王汝玉

憶昨京華歎轉蓬山莊相訪水雲通  
杯前秋葉鳬鷺渚  
橋外霜梧鶴鶴風城郭凋零無謝朓  
詩書博雅有王充  
萍蹤况復分南北湖上離情滿目中

題徂徠秀色松

虎頭白首久云別愛此百尺真蒼虬  
煙濤洶湧度靈籟  
月影微茫吹素秋廟堂豈乏梁棟用  
丘壑只應冰雪留  
空山使我增太息畢宏韋偃今誰流

春曉

弱柳搖煙落絮輕  
綠陰初長小池平  
杜鵑啼處催春急  
不是東風太薄情

周思得

字養真錢塘人歷  
事五朝壽算極多

默齋

化機無停運四序迭推遷  
萬彙遂生育彼蒼乃默然  
嗟君稟至性穎悟探幽玄  
遺榮猶脫屣九還得真傳  
一室人罕至雙砌綠苔綠  
虛庭松子落簾隙蛛絲懸  
幽蘭媚深谷明珠潛九淵  
更當究玄微拂袖凌紫煙

叱虎

西塞山前日將暮剪尾咆哮正當路腥風一陣心膽怖  
眼中寧有狐與兔雙瞳照人驚電飛磨牙吮齒生寒威  
當年褒鄂氣如爾爾獨啖人何所為

夢遊仙洞

石磴盤雲曲曲迴洞門高下碧桃開琪花瑤草連溪澗  
不見仙人跨鶴來

其二



雲樹蒼茫月正明  
座中還遇董雙成  
玉簫吹罷桃花落  
猶記霓裳譜曲聲

其三

仙人醉卧碧嵒秋  
白日倒掛嵒西頭  
猛虎一聲驚不醒  
西風吹夢落瀛洲

張全一

號三丰  
寶難人

楊州瓊花

瓊枝玉樹識仙家  
未信人間有此花  
清致不沾凡雨露

高標猶帶古煙霞  
厯年既久何曾老  
舉世無雙莫漫誇  
便欲載回天上去  
還從博望借靈槎

胡濙

訪張三丰至祥符寺見留題

交情久已念離羣  
獨向山中禮白雲  
龍送雨來留客住  
鹿銜花至與僧分  
疎星出竹昏時見  
流水鳴渠靜後聞  
却意故人知此隱  
題詩誰似鮑參軍

鄧羽

南海人武當道士  
前青陽縣令

暢情

花無長在樹人無長在世有花須當賞有酒須當醉秋  
霜上鬢來春風吹不去

寫懷

道人不作槐根夢一片虛頑太古心無雪可催蒼檜老  
有家原住白雲深山頭月落虎長嘯海面風生龍自吟  
世上何人窺此意野花啼鳥是知音

章志宗

字清源號道  
遙習五雷法

山居

人市事何雜山居日倍長柴門無過客花草自生香

詠杖頭童子

出入不離手行藏賴爾扶莫辭行路遠應念老人孤下水測深淺探朋窺有無待看仙詔下攜汝上清都

壽藏

尋得佳山水窮年得所依鑿苔開塚塔種樹作簾幃莫訝滕公喜休教莊老譏他年仙化去還有鶴飛歸

林泉

一炷清香一卷經  
琳琅振響徹雲扃  
仙人跨鶴凌風下  
玉笛雙吹入紫庭

山中秋日

山中秋日冷蕭蕭  
一谷寒雲伴寂寥  
黃菊傲霜花半老  
綠荷翻雨葉將彫  
煙霞遁迹規模小  
鉛汞還丹歲月遙  
試向西皇問消息  
青天端不負窮樵

應世

新營茅屋兩三間不着丹青也好看翠竹黃花閒裏翫  
高山流水靜中彈幾回大醉非干酒一任閒眠總是丹  
萬慮不侵心自樂數聲啼鳥韻林端

夜坐

牕間獨坐意脩脩一盞寒燈伴寂寥風是故人能自至  
月為佳客不須邀金甌泛酒飄春霧石鼎烹茶響夜潮  
千卷藥珠閒誦罷紛紛鸞鶴下青霄

林泉高興

山中無事日如年  
物外家風別一天  
嘉樹飄香來石几  
奇花弄影拂香筵  
呼童汲水烹新茗  
與客吟詩改舊聯  
滿目縱橫皆自得  
看雲閒對落花眠

至人

至人尚高潔  
不為名利關  
閒廬卧白雲  
把酒對南山  
南山青翠崖  
流水聲潺潺  
潏潏冷然清  
我心我心今  
正閒但得  
心中好何妨  
頭上斑

不言錢

阮籍性嗜酒嵇康不言錢二公生頗異誰云賢不賢我  
無嗣宗才亦無夷甫權懶向陌中走祇愛山中眠釀泉  
成美酒作詩成長篇求道心是道脩仙身是仙不靳皇  
命召須待玉音宣何時出世間騎鶴上青天

春晝

刺桐花開春晝長粉蝶雙飛過短牆萬彙喧囂誰張主  
布谷催耕春正忙黃鸝啼散暮天碧白鳥點破春山蒼  
三春可景好人意安得長繩繫太陽大哉化工陶萬物



蠢動臭腐皆生光人生有如石中火隨生隨滅何遑遑  
細推物理探元化日向東風吹幾場

四皓奕碁圖

何事山中閒奕碁顏如丹渥鬢如絲不將白眼看浮世  
且向山中歌紫芝歌紫芝心蕩蕩羸秦殘忍知不知若  
無張子房安肯出彤墀羽翼太子難動移雖有繒繳將  
安施扶弱安劉今幾時畫中見之恍在斯問之不答亦  
不顧妙算還他一着奇

示邀飲者

一日清閒一日仙  
本圖將息養殘年  
鄙夫不解神仙意  
往往催人上酒筵

落花

庭前俄見衆花開  
陣陣飄香入座來  
何事東風太無藉  
紛紛吹落滿蒼苔

盧大雅

亦龍虎山人

題錢塘勝覽圖

南渡衣冠委草萊危亭高處海門開雲霞都邑雄中國  
月露軒牕逼上台春夢已隨流水去寒潮空領夕陽來  
小樓題畫因惆悵豈獨昆明有劫灰

舟中寄張外史

棹郎催踏春溪舫阻我辭君散木亭江水未應春去漲  
鄉山偏向別時青煙波釣艇新衝雨河漢仙槎舊犯星  
輸與仙都吉居士一簾山雨聽鶯經

頂山

路轉青楓逕泉通古石橋規模靈隱小景像上方遙書  
壁藤牽袂尋源草沒鑪每懷登覽日東海暮生潮

子游舊宅

列國雄吞際人材北學難淒涼吳邑里惆悵魯衣冠舊  
宅歸蓬顆新祠倚杏壇一橋通夾巷蔽井樹陰寒

追哭張伯雨外史

身似浮雲年在吳玉鉤橋外是西湖花前微雨白鷺帖  
樓上好風金鴨爐李泌只宜留北闕劉郎那得老玄都

人情翻似東流水洗出青天一鳥孤

姑蘇懷古

胥目懸門烏喙過至今哀怨入吳歌山河不為興亡改  
城社其如感慨何廢苑春深芳草滿荒臺秋盡夕陽多  
醉來一覺扁舟夢也勝豪華逐逝波

挽鐵崖先生

玉笙聲斷泣龍君撼樹虬蜉謾作羣一代春秋尊正統  
兩朝冠冕在斯文他年有約尋圓澤後世何人識子雲

舊業門生今幾在下車空拜馬陵墳

答王叔潤

天祿然藜嬾校經扁舟隨處入鷗汀  
西風舉扇無王導  
東海移家有管寧  
溪雨初晴雲更白  
湖霜未落草猶青  
客樓寂寞江天外  
幾度遙瞻處士星



石倉歷代詩選卷三百六十五